

Date – 10/06/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

- Bairabi leh Sairang inkar relkawng phah zawh tak chu a him tawh tih vawiin khan puan a ni a, ramchhung rel inthlunzawm zingah Mizoram relkawng telh a ni ve dawn ta.
- Mizo Territorial Army Battalion (Home & Hearth) a tang duh te July thla atang khian district hrang hrangahte lak tan a ni dawn.
- Prime Minister Narendra Modia chuan kum 11 kalta chhungin ralthuam lamah nasa takin hmasawwna a thleng a ti.
- External Affairs Minister Dr.S.Jaishankar-a chuan firfiakte do kawngah China chu hmai hnih neia a chet a rem lo a ti.

<><><>

11 YEARS OF NDA GOVT - RAILWAY

Bairabi leh Sairang inkar relkawng phah zawh tak chu a him tawh tih vawiin khan puan a ni a, ramchhung rel inthlunzawm zingah Mizoram relkawng telh a ni ve dawn ta a ni.

An endiktu Commissioner of Railway Safety (CRS) Pu Sumeet Singhal chuan Hortoki leh Sairang inkar relkawng phah bik endik hna vawiin khan zovin km 33.864 a thui a ni a, hemi hma hian Bairabi leh Hortoki inkar bik a lo endik tawh a ni.

SFX with Locomotive Pilot byte

Tun thla ni 6 atanga vawiin thlenga an endik, Sairang leh Hortoki inkara rel kawng hi kilometre 51.38 a thui a ni a, mihring leh bungraw phur rel Mizoram a lut hian state sum leh pai dinhmun mai bakah mihring leh bungraw kal kual vel a ti danglam dawrh dawn ni a hriat a ni.

Akashvani News-in Sairanga cheng mithenkhat a kawm kual chuan rel lo lut tur chu lawmawm an tih thu an sawi a, tunah pawh rel kawng leh station-ah inhlawhfakna tur te an neih phah tawh a, rel a lo luh hunah phei chuan chawhmeh a tlawm tawh dawn nia an hriat avangin an phur hle tih an sawi a. Sairang Branch YMA President Pu Vanlalmuana chuan rel lo lut tur chu Sairang mipuite an lawm hle tih sawiin, Mizoram pum huap pawhin bung thar a ni a, changkanna rahbi zawh tanna hun pawimawh tak ni-a an hriat thu a sawi bawh a ni.

Sairang YMA Adviser, Area MUP President ni bawk Pu B. Lalrinthanga pawhin rel lo lut chu thil tha tak leh ram hmawsawna turah an ngaih thu a sawi a ni.

Northeast Frontier Railway (NFR) siam Bairabi–Sairang New Line rel kawng hi kilometre 51.38 a thui a ni a, section 4-ah then niin, Bairabi–Hortoki km 16.72 a thui, Hortoki–Kawnpui km 9.71 a thui, Kawnpui–Mualkhang km 12.11 a thui leh Mualkhang–Sairang km 12.84 a thui a ni a, leiverh 48, lei lian 55, lei te 87, Road Over Bridges 5 leh Road Under Bridges 6 a awm bawk a ni.

<><><>

FOREST MINISTER

Environment Forests & Climate Change Minister Pu Lalthansanga'n Mizoram mipuite chu kumin Green Mizoram Day thupui "Ruahtui khawl nan thing i phun ang u" tih pualin thingphun leh zik tluak taka enkawl turin a chah.

Naktuk-a state puma Green Mizoram Day lo thleng tur puala Mizoram mipuite thuchah a sawinaah Pu Lalthansanga chuan Green Mizoram Day chu duhthusamin tipuitling thei lo mah se, a hlawhtlinna tam tak hmuh tur a awm a ti a, zin veivak thin te chuan rilru ti thlamuang tham kawngsirah thingkung hmuh tur an neih a rin thu a sawi a ni.

Minister Pu Lalthansanga chuan Green Mizoram Day kaltlang hian kum 1999 atanga kum 2014 thleng khan thing tiak nuai 46, sing 8, 338 phun a ni tawh tih sawiin, Forest survey report 2023-a a lan danin, Mizoramah a ram zau zawng atanga tehin zaa 85.34 chu ramhnuaiin khuh mahse tan lak a la ngai hle tih a sawi a, nakin zela chhuanthar lo awm tur te tan ramngaw siam leh venhim kawngah te, nungcha leh thing chi hrang hrang humhalh kawngah te tlawmngai pawl, kohhran leh zirna in hrang hrangte tiamin mipuite chu hmalakpui turin a sawm a ni.

<><><>

TERRITORIAL ARMY

Indian Army hnuaiah Mizo hlang awmna, Mizo Territorial Army Battalion (Home & Hearth) din a ni dawn a, thla thar, July thla atang hian district hrang hrangahte Territorial Army a tang tur lak tan a ni dawn.

Mizoram sorkar hnuaia Coordination & Land Search Committee, Chairman, Lt. Col. Clement Lalhmingthanga MLA chuan vawiin khan Aizawl Press Club-ah thuthar thehdarhtute kawmin, tun dinhmunah Mizorama Territorial Army (TA)-ah hian mipa chauh lak an ni rih dawn a, kum 18 atanga kum 42 inkar mipa Mizorama piang leh seilian an ni ngei tih finfiahna lehkha pawimawh an neih a ngai dawn a ni a ti.

Ruahman lawk ang chuan TA a tang tur lakluhna hi June ni 14 atanga tan tur ni mah se, ruahsur nasa leh harsatna dangte avangin thla thar, July thlaah sawn a ni a, Aizawl district-ah TA a tang tur lakluhna hi neih hmasak ber tur a ni a, July ni 26-ah neih a ni dawn a ni.

July ni 27-ah Champhai leh Siaha district-ah, July ni 28-ah Mamit leh Serchhip district-ah, July ni 29-ah Kolasib leh Khawzawlah, July ni 30-ah Lunglei leh Lawngtlaiah, July ni 31-ah Saitual leh Hnahthialah te neih a ni dawn a, August ni 1 leh ni 2 chu Reserve day atan an dah bawk a, written test paltlang te chu medical

test neih pui leh an ni dawn a, chumi paltlang te chu November thla tirah Shillong-a Assam regiment training centre-ah thla 6 vel training tura ruahman a ni.

Mizorama Territorial Army bul tan nan hian Company pahnih a awm dawn a, company pakhat-ah officer pakhat leh Junior Commissioned Officer, JCO pali, bakah Other range-92, an vaiin mi 102 an awm dawn a, officer dil hun chhung chu waviin khan a tawp tawh a, Mizo tan bik ni lovin ram pum huapin a dil theih a, officer 19, hmeichhe pakhat leh mipa 18 lak an ni dawn a, July ni 20-ah exam buatsaih a ni dawn a, other range dil tur te tan pawl 10 pass nih a ngai thung a ni.

Tun dinhmunah Mizo Territorial Army Battalion te awmna tur hmun nghet chungchangah thutlukna siam a la ni lo a ni.



11 YEARS OF MODI GOVERNMENT – STATEWIDE PRESS CONF

BJP National Secretary Pu Anil Antony-a'n kum 2014-a Prime Minister Narendra Modi-a'n, 'Mi tin tan an mamawh ang hmasawnna thlen' tih thupui a neih bawhzuiin sorkar laipui scheme hrang hrang chu khaw tina mi rethei zawkte hamthatna tur leh zahawmna turin a taka kalpui mek a ni a ti.

He thu hi vawiina Aizawl Press Club-a thuthar thehadarhtute hnenah kum 11 chhunga Prime Minister Pu Narendra Modi kaihhruai Sorkar hmalakna hrang hrangte a puangzarnaah a sawi a, Pu Anil Antony chuan BJP kaihhruai sorkar laipui chuan hmasawnna chu a thupui ber a ni tih sawiin, Sorkar laipui scheme hrang hrang- Pradhan Mantri Awas Yojana emaw, Jal Jeevan Mission emaw, Ujjwala Yojana emaw te chu khaw tina mi rethei zawkte hamthatna tur leh zahawmna tur a siam a ni a, an tana thil pawimawh tak tak dawn theihna tur leh tih hlawhtlinna tur a ni a, a taka kalpui mek zel a ni a ti. Pu Anil Antony chuan kawngpui tha leh zau tak hmanga khaw hrang hrang inkalpawhna te, in tinah kawlpheha awm theihna tur te, in chhunga tui thianghlim herh hawna tur pek te, Digital India hmanga thalaite tih hmasawnna te chu chu Pu Modi-a sorkar thil ngaih pawimawh ber a ni reng a ni a ti a. Prime Minister Modi-a hmathlir chu a takah chantir a ni mek zel a ni a ti.

BJP National Secretary Pu Anil Antony chuan sorkar laipui hmalakna Pradhan Mantri Garib Kalyan Anna Yojana kaltlangin mi nuai 81 chuang hnenah 'ration' ei tur chi hrang hrang a thlawna pek an ni a, Ayushman Bharat Yojana hnuaiah mi nuai tam tak hnenah a thlawna damdawi ina inenkawlna pek a ni bawk a ti a, Swachh Bharat Mission kaltlangin khaw hrang hrangte chu hmun thianghlim zawkah leh hrisel zawkah chantir mek a ni bawk a, Jan Dhan account nuai 55 chuang hawn a nih bakah, Garib Kalyan Anna Yojana kaltlangin chhungkaw nuai 81-in a thlawnin buhfai an dawng bawk tih sawiin, sorkar chuan hmeichhiate zahawmna humhim sak leh an hnathawh tur dapsak te chu a ngai pawimawh hle a ti bawk.



Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM- NDA @11 YEARS

Prime Minister Narendra Modia chuan kum 11 kalta chhungin ralthuam lamah nasa takin hmasawnna a thleng a ti. NDA kum 11 tlin puala social media-a a thudahah he thu hi sawiin Pu Modia chuan ralthuam siamchhuah kawngah tunlai thiamna sang ber ber hman leh mahni intodelh chu an tum anih thu a sawi a. Ram chak tak nei tura mipuite inpumkhat tlat thei chu lawmawm atih thu asawi a ni.

Defence Minister Rajnath Singha pawhin Prime minister Modia hnuaiah defense sector lamah kum 11 chhungin inthlak danglamna a thleng nasa tih a sawi a. Social Media-ah he thu hi tarlangin PM Modia kaihhruaina hnuaiah ramri a him a, sipaite thuamchak an ni a, tualchhung siam ralthuamten hma an sawn a, rampawna ralthuam thawnehhuah a pung a, khawvel ramdangte pawhin Indiaah rinna an nghat tih a sawi.



EAM JAISHANKAR

External Affairs Minister Dr.S.Jaishankar-a chuan firfiakte do kawngah China chu hmai hnih neia a chet a rem lo a ti. Pu Jaishankar-a chuan Pakistan nena inlaichinna hnaivai tak nei chungin China tan firfiakte do a theih loh tih a sawi a. French chanchinbu pakhatin a kawmnaah Pu Jaishankar-a chuan India leh China te chuan pen khat te te ke penin an inlaichinna an siamtha thei tih a sawi bawk ni. Dr.Jaishankar-a chuan UN Security Council-a India a awm theih nan theihtawp a chhuah zel tih a sawi bawk a ni.



NDA @11 YEARS NE

Ram venhimna lamah kum 11 kalta chhungin ramchhung thilsiam kawngah nasa takin hmasawnna a thleng a. Kum 2016-a surgical strike atangin kumin 2025-a Operation Sindoor ah te India chuan a ram himna ti derthawng theite lakah a chet dan tur a ti chiang hle a. Tumbik nei takin firfiakte inkulhna hmun pakua kahchhiat a ni a. Hetah hian ramchhunga siam ralthuamte an tangkaiin thil an ti thei hle a ni. Ramchhuna siam INS Vikrant lawng liante, Light COmbat Helicopter thlengin ramchhunga siam chhuahte chhuang taka hman an ni. Hei bakah hian ramchhunga ralthuam ramdanga thawh zat pawh pungin cheng vaibelchhe sing 2 sang 3 leh 622 hu thawnehhuah a ni a. Kum 2014 nen tehkhin a let 34 in a pung a ni.

